

東文選

百十二

内閣文庫	
番號	漢 17777
冊數	130 (112)
函號	集 116 .1





東文選卷之一百十二

疏

丹本大藏慶讚疏

釋宓菴

道絕名邈法離見聞然渡海渡河要由船筏凡得  
魚得兔必借筌蹄而况文文據般若之光字字揭  
毗盧之印豈離黃卷別討玄機竊以結盡潮音號  
為海藏龍樹誦傳於西竺法蘭馱入於中華雖九  
牛之一毛尚千函而萬軸故難雕印莫廣流通間  
或得而經營例皆失於精妙念茲大寶來自異邦  
秩簡部輕函未盈於二百紙薄字密冊不滿於一

千殆非人巧所成似借神巧而就大抵或盛或衰者物之理有成有壞者事之常月散日亡函脫卷卷脫幅塵侵蠹蝕行缺字字缺文將無子遺良可深痛弟子竊聞修舊實倍圖新自寓禪源始發誠於修緝洎移松社終竭力於繕完函卷之脫則印之使全字行之缺則書而今具得檀橐之金而自書其目受御幣之帛而使貫其衣盛以琅函安於寶藏雖似綴麻而完錦庶同鍊石以補天光彩更生莊嚴悉備比及厥功之告畢擬憑箇事以落成集千指之禪流開九旬之海會發藏演經則手將

眼應尋詮得旨則口與心同或專定慧而照見自心或勤禮念而懺除宿障法輪大轉智鏡普周伏願云云德日連佛日以齊輝仁風共禪風而並扇金輪益固膺景祚於萬年玉葉寢昌播餘芳於百世

祖師禮懺兼發願文

牟尼拈花迦葉破顏印度傳燈之四七世達磨面壁神光斷臂支那續焰者二三家洎九峯列派於桑丘抑五葉連芳於松嶠祖脉從茲而繼繼宗途自爾以繇繇凡其入此門庭孰不承他恩力伏念

弟子假名練若濫跡浮圖器淺根微雖未到禪河  
之窮底願弘志遠恒不忘祖室之扶顛謂殫早懇  
以歸依可獲冥熏之加被茲展懺磨之席略陳供  
養之儀伏願我大和尚列聖同加百靈共衛色身  
常穩竟無二氣之小乖法臘遐延終與兩儀而並  
又次願弟子滌去多生之罪垢蠲除歷劫之障塵  
自從現在之時窮盡未來之際信根轉固生生常  
踐於斯門鏡智頓明在在廣宣於此法或劒樹刀  
山之上或火坑湯鑊之中苟有利於舍生終不辭  
於殞命必待衆生之界盡方期正覺之果圓跢若

多性兮可有消亡爍迦羅心兮決無動轉普願四  
生九類同成十方三身

甘露入院祝法壽疏

普光堂上之真輝如以青銅照膽慈忍菴中之法  
乳宛將甘露沃心宜憑覺應之無私小報師恩之  
罔極伏念弟子幼依禪藪深慕真乘屢會書達於  
二親以求剝度爭奈障濃於多劫未獲脫離因而  
趨末利於十年常不負初心於一日適吾松嶺和  
尚坐彼花山道場素志欲償遂膝行而仰告宿緣  
所契即頷肯而俯從雖竊愧黃梅之簸糠尚得效

丹霞之剡草尋稟南詢之教久勞北望之恩及當  
嗣席於曹溪始得摳衣於積翠自爾別承於眷愛  
迄今久費於陶甄心切老婆常自傾腸而倒腹頑  
同狂子莫能染指以霑唇故未叅入室之人况肯  
作克家之子而予性便閑適行謝規繩只堪爲雲  
水形骸豈合作叢林首領和尚乃憐兒不覺醜也  
取人無求備焉導垂天上之德音委以關東之名  
刹方初聞命徐自省躬屈踈逸之質於繩墨之場  
則狀同繫檻之猿致顛蒙之資於師範之職則勢  
若乘軒之鶴顧二途竝無可者擬百計終不受之

然恐傷浩劫之恩情未得遂平生之志願爰與苾  
芻而到寺肇開香火以過時縱非小子之本懷亦  
出大人之厚意茲展梵筵之殊勝用祈法臘之崇  
高冀此真功格于妙鑒伏願大和尚龍天共衛壽  
齊東院老人朝野咸歸位等南陽古佛

定慧入院祝法壽疏

感應道交即千機萬機之齋赴師資緣會非一劫  
二劫之由來宜仗慈泠小酬法乳伏願弟子識微  
覺後道未齊先魚嶺北殊勝名藍始叨守席鷄峯  
前清淨寶刹又忝司香茲寺也雙溪繞寺兮殊無

一點塵緣千嶂盤空兮自有十分爽氣實為助道  
之勝地真箇安禪之奧區緬惟慧照聖師幸際睿  
宗明主十年厭城隍之紛擾千里思林壑之清幽  
誓將歸老於此峯遂乃荆開於茲寺降及清真之  
世大振禪風洎于冲鏡之時繼興祖道凡居是境  
必待其人何緣末品之庸資濫躡前修之高躅此  
蓋縱未投針於龍猛孟底亦曾刻草於石頭堂前  
因以叨執侍於多年故再受陶甄於今日至躬率  
而入院抑手授以付衣平生慈愛之有加窮劫言  
宣而易旣帑空屋老人必不堪其憂德厚境佳予

常以為之樂報恩雖愧於瑣力薦福實出於真誠  
爰卜吉辰特修妙梵一穗香雲之纔起十方刹海  
之普熏伏願年月厄之並消陰陽沴之頓釋節宣  
常適千金神藥之無功壽筭彌增一串數珠之不  
足

法壽齋疏

為圓悟  
國師行

千重寶珠影裏聖乎凡乎一面古鏡光中師也第  
也理雖無彼我之異事則有自他之殊宜歸佛兮  
無歸而歸乃祝師以不祝之祝惟曹溪老和尚是  
震旦大沙門一開爐鞴以接機幾許入天之賴福

既慈悲出現且隨凡俗以同塵故寒暑推移已涉  
春秋於環甲其在迷盲之念盍懷戰懼之情肆修  
同涓滴之功緣用薦等虛空之壽量真真誠之一  
片格妙鑒於十方伏願大和尚法臘增崇甲子周  
天而不老色身永固毗嵐偃嶽而恒寧

大元皇帝祝壽齋疏

聖天子優渥之恩無遠不屆大覺皇妙明之鑑有  
感必通宜仗慈庥小酬洪祚伏念弟子濫紹祖門  
於五葉謬司禪席於一時縱居荒僻之陬殊荷聖  
明之化飢餐渴飲悉為舜德所霑夕點朝焚專是

堯年之祝矧今特垂雨露還錫土田喜同枯木之  
逢春快若涸鱗之得水天澤既殊於常筭葵心盍  
倍於平時爰當重九之辰普禮大千之刹歸依之  
懇兮人衆而心一斬嚮之誠兮口異而音同冀此  
涓功格于鏡智伏願皇帝陛下億萬年為父為母  
載育兆民百千世傳子傳孫永綏四海

又

桂魄當中雖處幽者必照葵心奉上何在遠而不  
傾宜仗真庥用祈帝筭伏念弟子邈居荒服幸際  
聖朝謬膺五世之祖門濫首三韓之禪席皇天隔



於辰所縱未參拱北之聯率土盡是王臣猶得被  
暨南之化吾眠之穩矣吾食之安矣誰德之大歟  
誰恩之厚歟茲極感銘竊圖報效富有九州也富  
何以益貴為萬乘也貴莫以加自份上所未得專  
惟壽外更無可薦故香火一場之精進朝朝焉夕  
夕焉惟岡陵億載之蕪傾心心念念念猶恐熏  
功之未至特張梵采以別修真茲悃幅之誠契彼  
國明之鑑伏願皇帝陛下兩儀齊壽二耀並明盡  
霜露所霑之方共為臣僕垂乾坤偕乂之統求錫  
子孫

又

慈光不導照窮法界之塵中睿澤無私霑及海隅  
之林下盍締勝功於真境用祈遐筭於皇闈伏念  
弟子濫紹祖門邈居荒服自聖主統臨於九土而  
小邦別戴於一天矧伊詔旨之符垂俾我僧徒而  
寧處三椽下飢餐渴飲無非綏遠之仁四序間夕  
炷晨香專是可長之祝茲陳梵席特舉熏科點點  
燈心增耀堯階之瑞日鬢鬢拂尾助揚舜殿之薰  
風誠既有加應何不速伏願皇帝陛下休徵備至  
治具畢張曆數遐延與乾坤而竝乂寰區率服致

文軌之僉同

尺

機隨玄化普收巨細而無遺愛主丹心豈以遐邇  
而有異宜仗毫毛之善小伸犬馬之誠伏念弟子  
生抱庸資斷無他技止習園基而闕局粗知奪角  
以衝關一路難通敢效馬綏明之稱聖九枰未較  
頗慙王積薪之學仙豈圖未品之賤能獲聞至尊  
之聰聽呼來禁闥累加密勿之恩命處都城屢降  
便蕃之賜祗恐黃梁之在夢何殊白日之昇天至  
充膚使以還鄉俯慰小人之懷土銘肌感極曾不

弛乎斯須薦壽誠深亦何忘於造次幸此修禪之  
精舍素爲祝聖之熏塲於焉開置於梵筵遂乃請  
宣於祖道功緣甚薄雖同捧土以培山感應若交  
可比補天之鍊石伏願皇帝陛下明齊日月德蓋  
乾坤合四海爲一家長御大平之域歷萬年又億  
載恒看不老之春

祝壽疏

塵中利物之悲是曰同體林下祝君之懇實無二  
心况別承賑賚之私益倍薦靈長之祚惟此禪流  
之林藪乃吾祖教之淵源人加厥功雖使法輪而

常轉食寡於口共憂齋鉢之屢空豈意上心曲垂  
下炤特霈九霄之雨露寵頒一月之資糧無復爲  
魚沫之相濡且喜得蟬腸之忽潤約自孟春之旣  
望迄于二月之方中別展熏筵精修梵米冀此心  
之款曲格他鑑之圓明伏願云云克荷天休寶曆  
遐延於億載益承帝眷兵塵頓息於四方后妃元  
子之咸寧宗戚懿親之共睦

又

菱鑿乃十方無導豈容纖瑩之忽生葵心無一日  
不傾矧被大陽之偏照宜憑覺接小荅皇恩念我

山門爲時禪藪衲徒萃止常不減二百餘人供費  
闕如殆難支一兩許月旣已蔬餐之未給幾乎萍  
跡之無留豈圖垂一封之紫泥乃命賜百碩之白  
粲光生水石喜溢叢林多時困轍之鱗忽然得水  
十載翹松之鶴無復移巢盍益勤香火之功而仰  
薦岡陵之祚肆張梵席特辦熏科冀茲真實之誠  
格彼妙明之鑑伏願主上陞下一粒作一年之筭  
百斛可殫而年不窮萬流爲萬福之源四溟寧竭  
而福無盡

又

覺月孤輪散作千江之影心香一片熏成九闔之  
祥宜仗勝功祝延遐算伏念弟子遭逢盛朝涵泳  
洪私溥天下率土濱何者不吾君之愛育清澗邊  
好山裏其誰如我輩之逍遙故茲香火之祈傾實  
是叢林之事業方設九旬之海會別興一日之供  
雲玉柄生風自有天龍之側耳銅爐擢穗已應祖  
佛之點頭伏願云云海岳產祥乾坤釀瑞節宣常  
適行看不盡之春秋國步恒安坐享太平之日月  
后闈帖泰儲掖康寧

又

壽吾君壽吾國平生滿肚之衷霞歸於佛歸於僧  
到處隨身之香火伏念弟子冬寄孟於主嶺春迴  
錫於曹溪在彼在斯等是皇恩之罔極若出若入  
何曾佛事之有閒故六時萬歲之山呼實兩地一  
般之日用茲陳梵席特辦熏科心香抽一篆之烟  
覺月落千江之影伏願皇上陛下自春徂臘常令  
玉燭以調和後天與地永致金輪之鞏固

祝聖疏

諸佛修因之悲願在利物焉老僧演道之功夫惟  
祝君耳况承異渥大越常情伏念弟子釋苑陳人

皇朝舊物閑雲戀岫只知養拙於深林病鳥栖蘆  
未獲覩光於行殿唯趁鍾魚而焚點仰祈警蹕之  
康寧何期睿眷之稠重俯降詔書之溫密披尋未  
既隕越難堪十牋批翰之盈眸一褱賜香之擁鼻  
光生庭戶寵溢叢林五葉叨承粗不墜祖門之遺  
緒三朝歷事曾莫如聖代之沃恩雖銘藏荷德之  
格天迺報效施功之無地茲竭通身之賴悃特開  
奉福之紺筵六時妙梵兮雷震晴空一柄高談兮  
瀾翻平地誠其不淺應必無稽伏願云云玉燭恒  
調璿璣克正天扶法駕始終南狩之考祥神助軍

功朝暮東征之報捷享祚萬千復千秋之不盡流  
慶焉萬又萬世之無窮終今祖道以大行求與邦  
基而竝久

又

白玉毫遍照塵方讚之莫及黃屋車遠臨海徼見  
所未會宜殫悃幅以歸依用禱康寧於行在伏念  
弟子猥以林泉之跡過蒙霄漢之恩天生一片之  
忠誠老而益篤日用三呼之遐祝死以爲期矧今  
陛下祗承帝命於東征親統王師而南幸瘴炎地  
遠想勞警蹕之行軍旅事煩恐軫聖明之慮繫國

步多艱之日是山僧奉福之秋茲特修精進之功  
庶欲借慈悲之援諷秘詮而稱聖號口口皆同一  
聲談祖教而演真宗心心悉無異念伏願主上陛  
下行仗百靈之翊衛動資三寶之加持東溟宣威  
旋見島夷之納款北宸獻捷寵承天子之報功

又

慈鍵隨機而便啓利洽群生皇輿自遠而言還慶  
流率土伏念弟子幸逢華旦叨守禪叢朝野間遠  
安邇安雖等沐至仁之無黨山林下眠穩食穩實  
偏承盛德之有加故時常克勵於熏修惟日用專

期於福利况值三宮之竝駕邈經萬里以入朝關  
山瞻望之寸情數月常如一日香火祈傾之叢懇  
六時罔有二心果聞利覲於帝庭遂乃別承於天  
眷旋迴其馭已復我疆抃躍之誠兮實倍平時薦  
祝之儀兮豈循常例茲特開於熏席而別締於勝  
功一爐噴十刹之香孤月落萬波之影伏願主上  
陛下玉曆金輪之彌久後天地以不窮璿宮銅禁  
之咸寧與松椿而難老國步永安而兵革絕乾文  
恒正而雨暘時

又

秋潭月朗慈光普現之難思朔漠天遙清蹕穩迴  
之可慶宜憑勝采用助昌祺竊以自我東韓賓于  
上國道途之遠兮古今所憚風土之習兮彼此各  
殊間歲一朝尚或難於行路半年再覲况復適於  
窮冬猶能併日而馳遂乃及期而往惟上心所屬  
欲庶民高枕而得安顧聖德之深雖闔國切身而  
難報言念山林之老衲素懷霞棗之忠誠方初聞  
車駕之啓行曾未暇食眠之寧處點焚多日心心  
恒掛於途中夢寐幾宵步步常隨於輦下果獲天  
扶而利覲仍將帝渥以遙還盍殫精進之功倍切

靈長之祝肆開梵席別展法輪談屑霏玉塵之風  
供雲起木魚之曉伏願云云三網克正十瑞竝臻  
時承帝闡之䟽恩終和且樂日與后闡而受福既  
壽又康

又

聖境慈深於利物普應群機僧家職在於壽君况  
蒙殊澤盍憑梵采用禱皇齡惟慈雲宗派之道場  
乃冲鏡師賓之蔭地境將居勝是九山學者之依  
歸名與品高必一代巨禪而後住如予者根微性  
鈍識昧才疎尚愧參諸弟之行敢望入先師之室

幸今遭逢盛朝涵泳優恩驟將不次之么軀濫受  
難堪之大器始而驚怪恍疑酣夢於南柯終乃燕  
居還似飛昇於上界謂欲小酬於洪祚要當益勵  
於熏功肆特開香火之筵而仰薦岡陵之筭叢林  
再整依然先代之典刑鐘鼓重新別是一時之光  
彩真誠所格妙鑒即周伏願皇帝陛下覺援遄加  
天休滋至嘉與后闈而壽考不涉春秋恒承帝閭  
之撫憐永安社稷

又

諸佛無私九類四生之咸仰一人有慶三韓萬姓

之同懽矧伊山野之資夙荷雲霄之澤洪惟我后  
祇事大朝意輸拱北之忠躬請征東之命帝乃俞  
音旋降寵賚荐加俾登相位於中書仍授兵權於  
行省先生四海威振兩邦是爲聖德之所招盍禱  
皇基之益固茲陳梵采別締熏功霞襯毳衣雷轉  
山崩之禮念風生塵柄雲興餅瀉之間酬冀此真  
誠格他妙鑒伏願皇上陛下仗百靈之翊贊承三  
寶之加持帆席未張立見倭君之嚼壁兵塵不起  
坐同舜帝之垂衣

又



毫光照物十方無地之子遺玉色違倪四海有誰  
之寧處况如鈍衲以荷優恩常切析宸寢之燕安  
豈意致天和之乖戾聞來震駭叵堪五內之分崩  
思可醫治莫若三歸之精進故此熏筵之急展盡  
吾微懇以克勤誠其有加應必不阻伏願主上陞  
下仗百靈之翊衛承衆聖之提撕病孽旋消不假  
驢馱之藥節宣恒適求膺龜負之圖

又

衆生俱是佛子故同承慈化之無私率土莫非王  
臣誰厚沐皇恩之如我盍憑妙援用禱遐齡伏念

云云素微福利之能以玷弘傳之職遭時艱梗殆  
未遑於眠食賴我聖明得不廢於焚點故每竭深  
誠而蘄嚮况別承異渥之稠重爰修一日之熏功  
仰薦萬年之洪祚此心所格他鑒即周伏願云云  
覺蔭恒加天休滋至長生難老之慶洽于九重既  
醉大平之歌騰於四海

又

聖凡同體到頭皆接物之門香火隨身何處不祝  
君之地赤心非飾玄應無疑伏念云云識昧弘傳  
道微福利鷲枝是守僻居雞嶺之深林鳳綉忽垂

命赴狼城之勝會敢憚關山之云遠徑諧徒侶以  
聿來張皇圓覺之道場敷演契經之義海天長之  
祝日用所專况聞法駕之命嚴將赴帝庭而修覲  
盍盡培山之力益修向日之誠茲殫精進之功仰  
告圓明之鑒伏念云云吉祥荐集悔吝頓消動資  
神力之扶持利有攸往尋荷帝恩之優渥薄言還  
歸

又

覺應頓彰有似蟾光之透水皇恩至重那堪蚊背  
之負山合叩慈高用祈天算伏念弟子曹溪嫡子

品日來孫出爲獨立之門人再亞崛山之禪侶因  
沾虛譽獲叨選席之大科謬沐洪私又玷批聯之  
徽號斯已踰涯之大過常居揣分以難安猥以忝  
緣於金枝遂蒙加秩於白誥茲一心之感懼實三  
寶之證知然無報德之階只有祝年之懇爰趨松  
社特辨檀筵功緣雖涓滴之至微因福實棗霞之  
鑿倒伏願神明共衛祖佛同加不困魏帝之一丸  
末膺難老無愧唐皇之十瑞長享太平

又

應物而百億其化大覺帝之慈悲祝君以千萬斯

年沙門臣之職分茲憑勝采敢布卑情伏念云云  
性本踈慵年其衰邁但安貧而守窟徒養拙以過  
時有月南之精藍有檀那之勝境重新廢址欲設  
會以落成三請老僧俾主盟而演道由致辭之誠  
切乃率衆而肯來尋常葵向之心有身奚極晨夕  
山呼之懇易地皆然期止五旬功逾三月更竭十  
分之丹悃別羞一日之紺筵或念或禮兮雷震山  
崩或問或酬兮雲興竝瀉真功所締妙應即周伏  
願云云三寶加持百靈翊戴履洪範九五福而致  
諸福福又福之畢臻東大椿八千年以爲一年年

復年之無盡

又

菱鑿現前盡十方而無尋葵心奉上何一日而不  
傾宜締真功仰祈洪祚伏念云云猥將庸鄙幸際  
聖明濫奉芝綸已玷乘輶之任俄遷栢署又叨持  
斧之聯是何無用之軀屢沐不貲之澤生成重乾  
坤之化報效微絲髮之功擬憑佛事之莊嚴小賽  
皇恩之優渥竊見鷄峯古刹宏揚鷲嶺遺風當九  
旬會海之權輿辦三日供雲之芬苾兼理將頽之  
老屋以修不朽之勝因悃悃所殫炤詳即邇伏願

云云皇基鞏固慶流萬世以遐昌后掖康寧歡洽  
千秋之難老

又

感應道交何妨老蚌之孕月都俞慶洽且喜飛龍  
之在天宜憑谷峇之私略表山呼之懇恭惟云云  
生稟天資之岐嶷時丁世運之艱難謂底綏於萬  
民曷辭勞於一已載親朝於上國仍求窈窕之好  
述尋却返於東韓率復昇平之大業兩邦成膠漆  
之固四境致鼎盤之安朝野同懽神人交抃伏念  
弟子禪林末葉釋苑孤根父曾受知於皇祖之朝

至登相位子又沐恩於聖考之代累轉名藍故微  
僧抃躍之一心與庶俗傾翹而百倍如不資於片  
善何以露於寸情茲修一日之熏功仰告十方之  
妙鑒伏願云云百祥荐集諸福畢臻合四海為一  
家俾昌而熾歷千秋又萬歲既壽且康

又

挂魄乃百川頓落難思覺鑿之無邊葵心何一日  
未傾况值聖躬之不豫盍資饒益用禱痊平洪惟  
國祚之更延實賴神功之再造故社稷安危之勢  
係吾一人凡朝野翹嚮之心期以億載矧伊老物

久沐洪私居常日用所為專是天長之祝爭柰微  
誠之未至忽聞和氣之小乖不覺心肝之遽摧罔  
知手足之攸措冀仗慈庥之覆護即臻宸寢之康  
寧特開水月之道場用薦岡陵之景祚儻茲悃悞  
契彼照詳伏願云云年月厄之咸消陰陽沴之頓  
釋疾即除愈無一朝一夕之彌留體常清和致百  
吉百祥之雜運

又

覺月亘性空而明照千刹歸依之懇心香盡法界  
以起釀九重壽考之祥伏念弟子職忝弘傳功專

福利叢席間二六時之精進身匪他心匪他贊階  
上百千歲之祈傾朝猶是夕猶是况值三元之肇  
屆盍資諸聖之冥加茲特修一日之熏科予以罄  
十分之卑悃銖緣所締鏡智即周伏願皇上陛下  
玉殿膺休璿宮衍慶轉千災成萬福福又福之有  
加合億載為一年年復年之無盡

大駕還國祝壽疏

慈門洞啓源西竺派中華宸馭電飛朝北庭暮東  
土宜竭歸依之力小伸抃躍之誠恭念萬里之遠  
兮跋涉非輕九重之貴兮興居不易乃易不易之

勢以輕非輕之行其故匪他欲民皆鼓腹而樂也  
此恩如報雖人盡碎身而足乎由是田夫野婦之  
合辭牧豎樵童之僉曰願吾君多福多壽使我輩  
底綏底寧矧惟山野之資優荷乾坤之化捷雲之  
跡縱隔於九霄愛主之心無忘於一日茲陳梵采  
別締熏功燈燈分無盡之光明遍周法界粒粒變  
多般之香味充滿性空伏願云云帝睠彌豐天休  
滋至享年有永嶽先夷而海先枯措世無虞兵常  
戢而歲常熟后掖著閔睢之詠儲闡騰鴻鵠之歌

彌陀齋疏

施七重羅網以莊嚴國名極樂設九品蓮臺而迎  
導佛號彌陀四十八願之甚深千百億身之普現  
欲資饒益盍罄歸依伏念弟子從無始劫來墮有  
情數內爲善焉析秋毫而莫喻造惡則盡空界以  
難容備受輪迴換面改頭者其幾常勤悔責痛心  
疾首也實多其蒙無尋之慈悲獲脫未來之苦惱  
或掃除私弟或趨請梵宮每當月滿之晨恭辦雲  
蒸之供誓心已往畢命爲期茲一禮一念之精虔  
想十明十通之照證伏念弟子信根益固障垢旋  
消現荷加持致諸福而却諸殃當承接引生彼方

而見彼佛

都元帥金侍中祝壽疏

玄關中利生之化有感必通朱闕下奉福之誠無  
時不篤况欲征莫測之地盍先杜未然之虞恭念  
賢侯挺生聖代曾樹膚功於百戰遂兼峻秩於兩  
朝中奉中贊之竝尊上將上相之俱貴貂弁蟬冠  
之望重百辟膝行虎符龜印之威高三軍肱慄載  
駕戎車而分閫將誅卉服之不庭萬騎長驅始似  
孔明之出蜀千艘競進終勝王濬之征吳如憑覺  
援於此時可致凱還於不日爰羞妙供特辦熏科

倘茲惘惘之心契彼圓明之鑒伏願云云一帆利  
涉坐看倭寇之倒戈萬旆穩回行詣舜庭而獻捷  
垂功名於竹帛闔歲月於松楸

薦冲鏡王師疏

智鏡騰輝胡漢同時而頓現世燈匿耀乾坤一朝  
而斗昏宜叩慈關用嚴報地惟我師之應世乘本  
願以弘禪化洽人天曾作三韓之標準望傾朝野  
卒為二代之師賓皇家福利兮萬目攸瞻祖道興  
衰兮一身所係夫何厭世乃爾貪程叢林索寞而  
冥依宇宙空虛而安住哀哀躋地有同失乳之兒

憫憫迷途何異喪家之狗念以平生之履踐想應  
本地之優游茲不廢於修齋蓋未免乎順俗七七  
齋之方屆三三寶之是供燈燈變作光明臺遍周  
法界粒粒化生妙香饌充滿性空區區此心了了  
他鑑伏願云云徑登覺路與諸達者以同遊重入  
祖門無一衆生而不度

冲鏡王師小祥齋疏

諸佛現為群生廣闢慈門而接引昔人去是今日  
且循世禮以追修念吾冲鏡老人寔我覺誠初友  
既繼花山之席又傳松嶠之衣終始因緣寃有頭

債有主死生悲慕天可盡地可窮今值練祥略羞  
雲供茲一心之懇款想三寶之證明伏願冲鏡王  
師頓發舊熏步步超登於覺路不遺本願塵塵重  
入於化門

薦崔社立疏

明珠普應想胡漢齋彰大廈忽摧噫驚雀奚托竊  
以空裏浮華兮本無起滅鏡中幻像兮安有去來  
然而非起滅時起滅宛然不去來處去來歷爾盍  
順凡情之顛倒用資報地之莊嚴肆值齋晨略陳  
梵席伏願崔氏尊靈一生圓佛果踞慈氏樓閣之



中萬劫入塵區戲普賢花林之內

薦泊良崔禪師疏

秋潭月落自然應現之無私夜壑舟移其乃負趨者有力惟此博陵逝魄迺吾聖嶠故人寓跡各殊雖未共行藏於出處交心既固終不忘以要於生平何期耳順之尚遙忽致魂遊之大速縱曰浮生之常理那堪沉痛於愚懷適當七七齋晨供偏三寶海功緣雖小感應已周伏願云云新善是資宿熏斯發九品蓮花臺上即一步而徑登七重羅網影中與諸聖而同戲

薦亡友李教尚書疏

法身應物而彰如水中月幻質隨緣而滅若空裏花念與隴西李公識彼烏合山寺爲人寬厚信佛精深以其好善與仁謂當必壽且貴然而或命與仇謀而再投於閑地或道將時左而一謫於外封鷓退風前鮎緣竹上位纔登於單三品齒不滿於六十年尚未階八座之聯而遽作九泉之客平生交契誰敢先於老愚今日慟傷實不後於昆李庶憑勝采用助清升適當百日齋晨供遍十方佛海伏願云云超生極樂國與諸菩薩同遊親覩無量

光蒙被如來授記

謝賜御製御書簇祝聖疏

諸佛悲深於利物肯違不飾之誠老僧職在於祝  
君矧受非常之賜伏念弟子栖遲窮谷涵泳聖恩  
昨垂溫密之綸言特錫希奇之寶簇天章兩絕粉  
豪瓊尺之清新宸翰六行金薤銀鈎之秀麗顛倒  
素開於鳳尾依稀若覩於龍顏何緣不肖之軀遽  
荷無前之寵感情到骨喜淚盈襟盍殫霞棗之片  
心倍薦岡陵之景祚肆營梵采別締熏功一爐烟  
縷之纔抽千器月輪之頽落伏願主上陛下玉曆

金輪之彌久璿宮銅禁之咸寧長御大平共膺難  
老時今調而九穀稔乾文正而七政齊

祝令壽疏

慈光朗若月潭千波頓現鈞化普於雨露百物同  
滋伏念云云幼而從事於文章晚乃投身於林壑  
雲酣月醉都忘浮世之閑名澗飲蔬餐自適平生  
之逸趣何意萍蓬行脚忽爲香火主人豈唯失其  
本心亦乃踰於微分然無計以遁去故不屑而就  
居爰舉梵科方啓夏安之勝會佇祈令筭特陳日  
供以精勤悃悃所殫炤祥即適伏願云云千祥沓

至百福畢臻德合阿衡邁尹躬咸有之一功高帶  
礪享孟氏達尊者三

恩門二相許祝壽疏

佛智甚深明鏡十分之照瞻公恩至重大山千仞  
之在肩勝采是憑休禎可薦念以樗材之散濫叨  
藻鑒之明公之視我也若其子然我之戴公也亦  
猶父爾問道學禪之二載雖阻侍於起居祝年祈  
福之一心尚何忘於寤寐矧今桑域干戈之大起  
鼎湖弓劍之忽遺會儲皇入覲帝庭以虛寶位抑  
寵宰出司兵艦靡暇廟謀社稷之虞兮係乎厥身

軍國之務兮叢于其手想憂勞莫如此際惟薦祝  
盍倍平時肆就鷄峯特張象席經營力薄雖云供  
養之未精悃悃誠深必也感通之無阻伏願云云  
身常居於慶閣足不蹈於危機椿桂恒榮歷千秋  
而難老蘭蓀競茂傳萬世以彌芳

請上堂疏

千簇山容竒妙自然脂粉之不勞一條溪舌廣長  
早是葛藤之無限要借現前指點方能直下承當  
恭惟大和尚文下薄日月之慈輝吞乾坤之氣宇  
雲籠古殿九重摩竭之掩關月鎖長江一葉華亭

之倚掉今者乘輿涉遠朝野臨深故啓居啓處之  
莫違盍壽國壽君之斯急伏望暫開門戶略展機  
鋒獸口烟生釀作行宮之瑞霧捧頭風起掃清歸  
路之妖氛

祝聖冬安居起始疏

隨機化遍一時齊現於十方戀闕情深半歲已踰  
於三載盍仗歸依之效小伸薦祝之誠伏念頃從  
屏障之間出守江湖之上雲霄在目何曾寤寐之  
暫忘雨露渾身雖至粉糜而奚報但把葵心之不  
飾仰祈天筭之無疆幸我弊封有茲精舍力辦九

旬之會海首興一日之供雲談柄風生口口瀾翻  
而竝瀉禪龕夜靜心心木槁以灰寒真此真功格  
他妙鑒伏願云云神明協贊佛祖同加聖祚遐延  
與乾坤而終始休徵畢至致朝野之又安

又

大覺帝十分玄應利物中具三心沙門臣一片丹  
棕祝君外無二念盍憑小善用薦洪休伏念弟子  
傳花開五葉之禪門入地有雙峯之祖室每荷九  
霄之異渥作息得安仰祈億載之遐齡斯須敢弛  
况今乾文屢變國步多艱東隣憂逆虜之窺窬內

闔慮厄年之交會不以是時而奉福更於何日而  
輸忠故此象筵之特展竭吾蚊力以別修燈心蘭  
焰兮遍炤於十方爐口檀烟兮普熏於千界真功  
所締妙鑒即周伏願云云諸聖冥加上天陰隲中  
宸有慶與后闡儲掖以咸寧外境無虞致賊霧狼  
烟之頓息

大元皇帝節日齋疏

圓鏡裏隨緣之妙應何處不周溥天下祝聖之真  
誠莫予為最適值誕彌之令節合資饒益於茲門  
伏念弟子生處荒陬幸遭盛際顧惟小土自修事

大之儀雖在窮山常被暨南之化故茲二六時之  
蕪嚮專是億萬歲之壽康况當電繞之辰盍罄山  
呼之懇肆展梵筵之清淨特修佛事之周遮蘭焰  
分輝化作堯天之瑞氣檀烟抽穗凝成舜殿之祥  
雲此心所殫他鑒即通伏願云云則天之天之大齊日  
之明從今年享至萬年萬復萬而萬無盡俾後世  
傳於千世千又千而千不窮

定慧入院祝聖夏安居起始疏

谷荅是天真之化人所願求者必從山呼雖日用  
之功吾今薦祝也倍切宜憑芥善略表葵心伏念

弟子幼慕真乘晚投禪藪但竊效丹霞之選佛安  
敢希盧老之傳衣僅襲祖風濫作曹溪嫡子過蒙  
聖德謬爲甘露主人乃因野性之疎慵不耐衆緣  
之檢束擬收身而靜退將畢命以優游何期鳳詔  
之德音復委鷄峯之寶刹茲寺也三國老聯芳之  
地諸禪翁續焰之場雖云揣分難堪要且當仁不  
讓爰與禪流而到寺肇開梵席以祝君千族奇峯  
萬古烟霞之色六時清楚一新鐘鼓之聲特張九  
夏之熏筵用薦萬年之遐筭真誠所格妙應即圓  
伏願云云九重日月之恒新永應難老四塞風塵

之頓息坐見大平

賀新登寶位祝聖疏

一輪月滿頓分蟾影於百川九曲河清果見龍飛  
於千載宜仗歸依之效用伸蹈舞之誠恭惟云云  
以聖敬之資值艱危之際風霜萬里備嘗跋涉之  
勞冰炭兩邦終結和親之好此日桑丘之土著幾  
年榆塞之露眠欲其順俗以權時至乃易形而變  
服仍踐唐家之舊典遂成媯汭之新歡歷代罕聞  
諸侯聳觀實爲萬世所賴豈特一時之休行宮邈  
在於北庭先馭忽昇於上界故朝野望天而引頸

竊疑周冕之無遺及乘輿返國而膺圖爭喜漢儀  
之依舊於戲世不終否時然後昌肆當累卵之辰  
復見安孟之日和氣旁流於普率懽聲競沸於邇  
遐念惟窮谷之殘僧實是先朝之舊物方袍圓頂  
雖然外相之有殊直節忠誠尚爾中心之無改自  
聽慶音之落耳曷勝喜淚之盈襟縱微福利之能  
尚有蕲傾之懇茲陳妙梵特辦熏科塵尾產涼欲  
助堯風之遠播燈心吐焰庶增舜日以長輝悃悃  
既殫照詳奚阻伏願云云兩儀齊壽二耀竝明邦  
雖舊命惟新立見黎民之於變天無親德是輔坐

今率土以咸賓

又

慈雲廣布群萌各遂其生德月初昇幽谷亦蒙其  
照合憑勝采用助昌祺恭惟皇上陛下乃聖乃神  
允文允武幾度龍沙之遠涉忘已劬勞邇來鰈域  
之再蘇是誰恩力以東國金枝之貴接上朝玉葉  
之芳寵幸無前休祥罕比及值先朝之晏駕迺回  
舊壤以襲封丕顯哉丕承哉周祚繇繇之可慶盡  
美矣盡善矣堯風蕩蕩乎難名懽呼奚止於搢紳  
蹈舞悉同於樵牧言念山中之老拙夙叨輦下之

息榮盍殫罄并之誠倍切龜長之祝肆張熏席恭  
辨梵科一炷檀烟布雲臺於諸刹千燈蕙焰施光  
網於十方莫茲無作之功契彼難思之鑒伏願云  
云坤明共贊祖佛同加松茂竹苞光闡重興之業  
椿枯桂朽永膺難老之期

祝大駕消災仁王千手智論四種法席疏

歸佛會無間斷事如香火之別陳祝君蓋是尋常  
况值乘輿之遠涉敬惟我后祗事彼朝至承釐降  
之異恩優荷撫綏之大德山川瓊隔曠修朝覲之  
儀歲月屢更曷極慕瞻之念載命兩宮之駕旋登

萬里之途獲金枝玉葉之幼冲冒沙塞鐵關之嶮  
岨欲值平安於行在要資精進於歸依故天使親  
降而傳宣仍頒信粒矧山僧素專於奉福盍炷心  
香爰當九夏之道場特展四般之熏席或誦念消  
災之妙諦或諷宣護國之靈詮或談揚別傳宗旨  
則口口瀾翻或唱演大悲心呪則聲聲雷振各期  
七日欲循環終始以克勤常趁六時至迴蹕歸來  
而後已真此勝功之積累格他妙鑒之圓明伏願  
云云衆聖加持百靈翊衛利有攸往既見既觀之  
孔嘉事無不諧言告言歸之斯速



東文選卷之一百十二

東文選卷之一百十二



